

dans les terres pour entendre parler de l'Euangile: le peu de cōnoissance qu'on luy donna de cette doctrine toute celeste le fit refoudre de se venir presenter luy mesme tout malade qu'il estoit: si tost qu'il vit le Pere, le voila plein de ioye, & encore qu'il eust la mort entre les dents comme l'on dit, il voulut estre porté à la Chapelle afin de receuoir le baptesme avec toutes les saintes ceremonies, conuiant tous ses gens de s'y trouuer pour rendre vn témoignage public [231] de l'estat qu'il faisoit de la Foy & de la priere. Voila par où le Pere commença sa Mission.

Le Capitaine de Tadouffac ne fut pas moins content de sa venuë que ce bon Neophyte. Il fit le soir vne belle harangue en ces termes; Réioüissons nous tous, voila nostre Pere arriué, il est avec nous, vous sçauiez combien il nous aime, il ne fera pas icy pour vn peu de temps, nous en ioüirons tous. Que tout le monde assiste aux prieres tous les iours, & à l'instruction qu'il nous donnera, confessons nos pechez nous qui sommes baptisez, & puis taschons de marcher droit, ne l'attristons point pendant qu'il est avec nous. Tout ce monde répondit à ce discours par vn cry public, pour marque qu'ils auoient volonté d'obeïr au desir de leur Capitaine, & de ioüir du bon-heur qu'ils receuoient de la presence du Pere.

Après cette commune réioüissance les sauages commencerent à rendre compte de tout ce qui s'estoit passé pendant leur grande chasse de l'hyuer. Ils ont coustume de demander vn papier ou vn [232] Calendrier pour reconnoistre les iours qu'on respecte: c'est ainsi qu'ils nomment les Dimanches & les Festes. Ils disoient donc que leur coustume estoit d'estendre ces iours-là & de mettre en veuë vne belle grande image